

## Dr Has isch g'storba!



Vor a paar Tag isch onser Wach- und Kampfhas', a Zwergkaninchen, gstorba. Em biblische Alter von elf

Johr. Jetzt isch Staatstrauer bei ons a'gsagt, obwohl insgeheim alle Beteiligte eigentlich dia Hasazeit scho seit längerem am liebschta beendet gsäh hättat. Des Kaninchen „Moritz“ isch em zarta Alter von femf Wocha zu ons komma. Meine Mädla hend des domols ganz heimtükisch eig'fädelt. Beim Dorffescht hot's en Flohmarkt geba ond do hot ebb'r junge Kaninchen mitsamt em Käfig vrkauft. I han scho femf Halbe dronka ghet ond ben ganz guat drauf gwäg. No isch mei hinterhältige Jüngschte komma, hot mi mit ihre schwarze Haselnussauga a'ghimmelt ond gfrogt, ob sie a Häsele kriegat dät. 's dät bloß femf Mark koschta. Des war a stichhaltigs Argument für mi als Schwob. Also han i en meim Achtelsballa glei zwoi Häsla kauft, damit des oine net so alloi isch. Mr isch jo schließlich Tierfraind.

Mei Schwogr, dr Schreiner, hot ons a wahnsinnig tolles Luxus-Hasahaus aus Holz, mit Biberschwänz deckt ond zwoi abteilbare Ställ samt Fußbo-daheizung baut. Alloi 's Material hot domols femfhundert Mark koschet. Wenn i des vorher gwisst hät. Jedafall hend's dia Häsla bei on richtig schee ghet. Mordgedanka warat eigentlich nia vorhanda – obwohl i Kaninchenbrota o'heimlich gern mag.

Jetzt hend dia zwoi Häsla Jonge kriegt. 's erscht Mol vier und vier Wocha später scho wieder femf, obwohl mr ons gsagt hot, des wärat zwoi Weibla. Dem biologische Wundr hend mir obengt Ei'halt gebietamiassa ond den Hasama' kaschtrieralassa. 60 Mark!! Des hot aber sei Weible net verstanda wella ond isch alle vier Wocha wie a rallige Katz om den armaluschtlasa Hasama' romg'hopft, hot sich auf en drauf gesetzt ond vrsucht zu stimuliera. Aber do hot net amol meh a Hasaviagra ebbes gnützt. Des

hot se so krank gmacht, dass mr se hot operiera miassa. 180 Mark! Se isch no trotzdem zwoi Wocha später trotz ra zwoita Operatio (240 Mark!!!) gstorba. Jetzt hot onser Hasama' des durchaus üblich Rentnerläba gführt: er lebt alloi en ra viel zu große Hasavilla. Ond draußa en dr freie Wildbahn währat



die Karnikel froh, se hättat a Dach ibrm Kopf.

Dr Has isch älter ond älter worda, obwohl Kaninchen eigentlich höggstchens 7 Johr alt werdat. Von meine Mädla hot en längsch't koina meh vrsorgt.

Noch dem Hasaseniör hend mei Frau ond i guckt. Ond jetzt isch'r gstorba. Noch elf Johr! Ganz schnell hemmr dia Hasavilla vr'schenkt. Dera Familie mit dem kloina Bua han i nadierlich net vrzehlt, mit was für Folgekoschta do zu rechna isch. I werd jetzt des künftiggsparte Geld en an guada Kaninchenbrota a'lega...

Bis näggschd Woch'

Ihr

Wulf Wager